

Tajuk : UNIMAS Raih Anugerah Industri Air Cemerlang Pehin Sri MWA

## UNIMAS raih Anugerah Industri Air Cemerlang Pehin Sri MWA

**KUCHING:** Universiti Malaysia Sarawak (UNIMAS) dianugerahkan Anugerah Industri Air Cemerlang Pehin Sri oleh Persatuan Air Malaysia (MWA) pada 28 November lalu sempena Pameran Air Sisa dan Air Borneo di sini.

Anugerah itu diberikan sebagai mengiktiraf output penyelidikan yang dibuat oleh Pusat Kecemerlangan Penyelidikan Air (CWR) UNIMAS.

Menurut Pengarah CWR Unimas Prof Dr Lau Seng, CWR ditubuhkan dalam Institut Biodiversiti dan Pemuliharaan Alam Sekitar di UNIMAS sejak dua dekad lalu untuk menerajui penyelidikan dalam bidang air dan sumber air.

“Kerja penyelidikan itu meliputi perkara seperti kualiti air sungai dan tasik di Sarawak, pencemaran air, rawatan air sisa dan pengurusan sumber air.

“Anugerah ini adalah sebagai pengiktirafan terhadap kerja penyelidikan dan ilmu pengetahuan baharu yang dihasilkan UNIMAS,” kata Lau.

Tambah beliau, ia merupakan satu penghormatan bagi UNIMAS khususnya bagi CWR untuk menerima pengiktirafan sedemikian dan ini akan mendorong mereka untuk berusaha dengan lebih gigih lagi.

Sekarang, katanya, UNIMAS

sedang mengusahakan perawatan sisa buangan ladang kelapa sawit untuk mencapai sistem kumbahan sifar yang lestari dan mesra alam.

“UNIMAS mengalu-alukan kerjasama dan juga pelabur untuk membiayai kerja penyelidikan,” katanya.

Berhubung perkara lain, Lau berkata UNIMAS turut menjalankan penyelidikan berhubung pengurusan sumber air bersepadu (IWRM) dengan harapan memajukan model pengurusan lembah sungai yang mapan di Sarawak.

“Sarawak diharap akan memiliki sumber air yang diurus dengan baik dan dapat mengelak krisis air seperti yang dihadapi negara lain,” jelas beliau.

Terdahulu, Lau mewakili CWR UNIMAS menerima Anugerah Industri Air Cemerlang Pehin Sri yang disampaikan oleh Menteri Muda Kemudahan Awam (Bekalan Air) Datuk Sylvester Entrie Muran, pada majlis makan malam di sini, kelmarin.

Anugerah turut merangkumi hadiah wang tunai RM10,000, sijil dan cenderamata.

Hadir sama ialah Setiausaha Tetap Kementerian Kemudahan Awam Ubaidillah Abdul Latip dan Presiden MWA Ahmad Zahdi Jamil.



**TAHNIAH:** Entrie (dua kanan) menyampaikan cek kepada Lau (dua kiri) sambil disaksikan Ubaidillah (kanan) dan Ahmad.